



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 04.05.2026. godine

VIJEĆNIČKA PITANJA
POSTAVLJENA NA 17. REDOVNOJ SJEDNICI OPĆINSKOG VIJEĆA VOGOŠĆA
održanoj 30.04.2026. godine

Na 16. redovnoj sjednici Općinskog vijeća vijećnik **Selimović Bego (u ime Kluba vijećnika SDA)** postavio je slijedeća vijećnička pitanja:

17/1. Obzirom da naselje Svrake nije nikad obilježeno adekvatnim znakom za obilježavanje naselja i gradova, postavljam pitanje da li je Općina nadležna da to realizuje ili da pokrene inicijativu prema ministarstvu koje je nadležno da se to riješi.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

17/2. Postavljam pitanje nadležnoj službi da li je planirana i kada će biti sanirana asfaltna podloga u neposrednoj blizini raskrsnice Šipska – M18 u naselju Kobilja Glava. Na navedenom lokalitetu ispred zaustavne trake u blizini semafora iz pravca Adil-begove džamije, došlo je do oštećenja asfaltna podloge, što značajno ugrožava normalno odvijanje saobraćaja i sigurnost učesnika u saobraćaju. Kako bi se poboljšala sigurnost i omogućilo nesmetano odvijanje saobraćaja na navedenoj raskrsnici, neophodno je da se izvrši popravka oštećene kolovozne površine. Potrebno je da nadležna služba poduzme potrebne mjere kako bi se navedeni oštećeni dio asfaltna podloge sanirao.

17/3. Postavljam pitanje nadležnoj Službi za geodetske, imovinsko-pravne poslove i katastar općine Vogošća. U dostavljenom odgovoru na vijećničku inicijativu broj 16/2 navedeno je da uklanjanje grafita spada u redovno održavanje zajedničkih dijelova zgrade i da je obaveza etažnih vlasnika i upravnika za uklanjanje istih. Međutim, imajući u vidu da ispisivanje grafita predstavlja krivično djelo i oblik vandalizma, te da se radi o narušavanju javnog reda i izgleda urbanističkog prostora, molim da se pojasni:

- Zašto se uklanjanje grafita tretira isključivo kao obaveza građana i upravnika zgrada, a ne i nadležnih službi.
- Da li Općina planirala u Budžetu sredstva za sufinansiranje aktivnosti kao što su uklanjanja grafita, s obzirom na odredbu člana 59. Zakona o upravljanju zajedničkim dijelovima zgrade, koja obavezuje općine da planiraju sredstva za nužne popravke na zajedničkim dijelovima zgrada.
- Na koji način se građanima može pružiti institucionalna zaštita i podrška u uklanjanju grafita, kako bi se osigurala urednost i sigurnost javnog prostora.

Ispisivanjem grafita nanosena je šteta kako građanima, tako urbanističkom izgledu javnog prostora općine naročito urbanog dijela koji oslikava zapuštenost. U vezi s tim potrebno je odgovoriti šta je nadležna služba konkretno poduzela na zaštiti javnog prostora od ovakve pojave vandalizma.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

17/4. U kojoj fazi se trenutno nalazi izrada Odluke o komunalnom redu na području općine Vogošća, te da li je ista finalizirana i kada se može očekivati njeno upućivanje Općinskom vijeću na razmatranje i usvajanje.

Obrazloženje:

Na prethodnim sjednicama Općinskog vijeća pokrenuo sam inicijativu za izradu i donošenje Odluke o komunalnom redu, s ciljem sveobuhvatnog uređenja ove oblasti i omogućavanja efikasnijeg inspeksijskog nadzora na području općine Vogošća. Tom prilikom dostavljen mi

je odgovor da se izrada Odluke nalazi u završnoj fazi, te da su provedene aktivnosti na pripremi nacрта, uključujući analizu važećih propisa i njihovo prilagođavanje potrebama općine. Također je navedeno da je preostalo interno usaglašavanje nacрта od strane nadležne službe, nakon čega će isti biti upućen u daljnju proceduru, odnosno dostavljen Općinskom vijeću na razmatranje i usvajanje. S obzirom na to da je od navedenog odgovora proteklo pet mjeseci, a imajući u vidu hitnu potrebu za uređenjem ove oblasti i unapređenjem inspekcijskog nadzora na području općine, molim za preciznu informaciju o trenutnom statusu izrade Odluke, kao i o planiranom roku njenog upućivanja Općinskom vijeću.

- 17/5.** Prema informacijama kojima raspolažemo, a imajući u vidu veliki broj upita građana, preduzeće KJKP "Toplane Sarajevo" d.o.o. je dana 23. marta podnijelo zahtjev Općini Vogošća za izdavanje urbanističke saglasnosti (građevinske dozvole), uz prateću potrebnu dokumentaciju. Također, poznato je da je Općina predmet uputila Zavodu za planiranje razvoja Kantona Sarajevo na dalje postupanje. S tim u vezi, molim da se dostavi informacija:
- Da li je Zavod za planiranje razvoja Kantona Sarajevo dostavio traženo mišljenje/opiniju Općini Vogošća.
 - U kojoj se fazi trenutno nalazi navedeni postupak.
 - Koji su naredni koraci i okvirni rokovi za okončanje procedure.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

- 17/6.** Postavljam vijećničko pitanje prema Kantonalnom Zavodu za zapošljavanje, te molim da mi se dostave sljedeći podaci i to:
- Koji je broj nezaposlenih lica na području općine Vogošća zaključno za 31.12.
 - Koji je broj firmi koje su se obratile sa zahtjevom za angažovanjem radne snage sa područja općine Vogošća.
 - Koliko je tokom 2025. godine zaposleno lica preko Zavoda sa područja općine Vogošća.
 - Koji je broj angažovanih stranaca u firmama na području općine Vogošća.
- 17/7.** Molim da nadležna općinska inspekcija i druge nadležne općinske službe dostave informaciju o stanju građevinske deponije na lokalitetu između ul. Izeta Delića i Igmanska. Već duži vremenski period na navedenom lokalitetu se nalazi veća količina deponovanog građevinskog materijala u vidu kamene frakcije koja stanovnicima na navedenoj lokaciji svakodnevno stvara probleme i otežava svakodnevne aktivnosti. Prema informacijama, svakodnevno teške građevinske mašine i kamioni vrše utovar kamene frakcije, stvaraju velike količine prašine koje stanovnicima ul. Izeta Delića otežavaju život. Zbog svega navedenog molim odgovor po kojem osnovu je materijal deponovan, da li postoje bilo kakva odobrenja i šta je poduzeto od strane nadležnih organa.

Vijećnica **Šabić Dalia (u ime Kluba vijećnika DF)** postavila je slijedeća vijećnička pitanja:

- 17/8.** Na 9. redovnoj sjednici Općinskog vijeća Vogošća podnesena je inicijativa za sanaciju uklonjenih metalnih kanalisa (rešetki za odvod vode) oko fontane na Trgu žrtava Srebrenice, s ciljem otklanjanja sigurnosnog rizika za građane, posebno djecu. S obzirom da do danas inicijativa nije realizovana, molim nadležnu službu da dostavi informaciju u kojoj fazi je realizacija ove inicijative i kada se može očekivati njeno konačno rješavanje, imajući u vidu da dolazi topliji period godine, kada je povećan broj djece i građana koji borave na ovoj lokaciji.
- 17/9.** Dana 28.12.2023. godine pokrenuta je vijećnička inicijativa za uvođenje minibus/kombi linije Donja Jošanica – Krše – Ugorsko. Šta je konkretno urađeno po tom pitanju do danas, da li su ispunjeni traženi uslovi Ministarstva saobraćaja Kantona Sarajevo i kada građani mogu očekivati uspostavu linije.

Vijećnik **Bogilović Enis (u ime Kluba samostalnih vijećnika Bogilović-Džano)** postavio je slijedeća vijećnička pitanja:

- 17/10.** Da li su upoznate općinske službe, načelnik i pomoćnici načelnika da se na području gdje su firme Pretis i Volkswagen nalazi firma RCB Nanotehnologija d.o.o. koja se bavi izradom crnog karbona koji se dobiva od prerade fosilnih goriva ili novom tehnologijom koristeći automobilske gume pvc plastiku printere i sl. Da li su urađene studijske analize na

zagađenost zraka zemlje i vode prilikom reciklaže i izrade crnog karbona. Kolika je štetnost za stanovnike i kvalitet življenja okolnih naselja i same općine Vogošća.

17/11. Da li postoji mogućnost odvoza kabastog otpada na području općine Vogošća više puta (3-4) u godini dana na određenim lokacijama.

Vijećnik **Mehić Almedin (u ime Kluba vijećnika SDA)** postavio je slijedeće vijećničko pitanje:

17/12. Postavljam pitanje prema resornoj službi, a radi se o čišćenju ulica poslije zimskog održavanja.

Obrazloženje:

Molim vas da mi odgovorite kada je planirano čišćenje, odvoz šljunka, te sapiranje ulica poslije zimskog održavanja na području naše općine. Nadam se da će se isto izvršiti detaljno, pokupiti višak šljunka i pijeska i odvući, a ne da ga gurnu u odvođe i kanalizacione cijevi, što bi dovelo do začepljena sistema odvoda. Proljeće je uveliko krenulo, pa se nadam da će i izvođači zimskog održavanja poštovati ugovore koje su potpisali s našom Općinom.

Vijećnik **Cvrk Ćamil (u ime Kluba vijećnika DF)** postavio je slijedeće vijećničko pitanje:

17/13. Na uglu ulica Igmanska i Tome Mendeša već duži niz godina nalazi se napušteno i zapušteno gradilište. Prostor oko gradilišta nije adekvatno osiguran i ograđen i kao takav predstavlja potencijalnu opasnost po građane Vogošće, a pogotovo po djecu koja svakodnevno prolaze pored te lokacije. Pomenuta lokacija služi kao nalegalno odlagalište odbačenih stvari i kao sklonište za pse lutalice. U skorije vrijeme su na lokaciji gradilišta izvođeni radovi na otkopavanju vjerovatno vodovodnih ili kanalizacionih cijevi. Te rupe još uvijek nisu zagrnute niti na odgovarajući način osigurane. Postavljeno je nekoliko kočica preko kojih je zategnuta traka što bi, vjerovatno po mišljenju onih koji su tu radili iskopavanja, trebalo biti dovoljno da lokacija bude sigurna. Međutim to je daleko od sigurnog. Treba napomenuti da lokacija nije ograđena ni sa strane ulice Igmanska, pored autobusnog stajališta, tako da svi oni koji dolaze u Vogošću i izlaze na toj stanici prvo što vide je taj zapušteni objekat što i nije baš lijepa slika. Pitanje za nadležnu općinsku službu je da li su dosad preduzete bilo kakve radnje da se vlasnik lokacije upozori na stanje iste i da je dovede u iole pristojno stanje. Ako to ne mogu službe Općine Vogošća, onda upit treba proslijediti na neki od viših nivoa.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

17/14. Pitanje upućujem nadležnoj službi i Ministarstvu za obrazovanje i Ministarstvu za saobraćaj. Obraćam vam se na inicijativu roditelja i stanovnika naselja Blagovac, s posebnim akcentom na relaciju Blagovac III – Blagovac V, a u vezi organizacije vanlinijskog (školskog) prevoza učenika osnovnih škola „Mirsad Prnjavorac“ i „Zahid Baručija“. Naime, postojeći školski minibusi koji prevoze učenike sa područja Blagovca trenutno saobraćaju do Blagovca III, dok učenici iz Blagovca V nemaju adekvatno riješen prevoz do škole. Na predmetnoj lokaciji (kod lokalne prodavnice u Blagovcu V) postoji prostor koji omogućava bezbjedno okretanje minibusa, čime su ispunjeni tehnički uslovi za produženje postojeće trase. Kao razlog za neproduženje linije navodi se postojanje redovnog gradskog prevoza. Međutim, prema navodima roditelja, taj prevoz je izuzetno neredovan i nepouzdan, zbog čega učenici često kasne ili nisu u mogućnosti na vrijeme doći na nastavu, što direktno utiče na njihovo obrazovanje. S tim u vezi, postavljam slijedeće pitanje: da li nadležni organi mogu preispitati postojeću odluku i omogućiti produženje trase školskog minibusa od Blagovca III do Blagovca V, uzimajući u obzir stvarno stanje na terenu i potrebu da se djeci obezbijedi siguran i redovan dolazak u školu. Također, molim da se dostavi informacija da li je moguće izvršiti procjenu opravdanosti ove izmjene na osnovu broja učenika i učestalosti problema sa postojećim gradskim prevozom.

Vijećnik **Pašić Edin (u ime Kluba vijećnika SDA)** postavio je slijedeće vijećničko pitanje:

17/15. Obzirom na upite određenog broja korisnika usluga JU Zavod za medicinu rada Kantona Sarajevo, postavljam pitanje istoj kao i Ministarstvu zdravstva Kantona Sarajevo koje glasi:
- Koji su razlozi zbog kojih usluge medicine rada u Kantonu Sarajevo, konkretno ambulanta Vogošća nisu organizovane u dvije smjene svakim radnim danom.

- Postoji li plan za unapređenje dostupnosti usluge medicine rada ambulanta Vogošća u narednom periodu, uključujući rad u dvije smjene svakim radnim danom.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

17/16. Krajem 2026 ili početkom 2027. godine u općini Vogošća će se otvoriti mega evropski tržišni centar "LIDL", što predstavlja veliki iskorak u modernizaciji i promociji općine Vogošća kao industrijsko-ekonomskoj i turističkoj destinaciji općine u Kantonu Sarajevo. Obzirom na stalne gužve u saobraćaju u našoj općini, da li se radila neka studija o saobraćajnom rješenju kada se otvori ovaj centar, a posebno jer se u blizini nalazi i tržišni centar Bingo, koji također, zbog neriješene raskrsnice pravi gužve, prilikom skretanja za pomenuti centar.

Vijećnica **Salčin Sabiha (u ime Kluba vijećnika SDA)** postavila je slijedeće vijećničko pitanje:

17/17. Da li Ministarstvo saobraćaja Kantona Sarajevo u saradnji sa Direkcijom za ceste Kantona Sarajevo planira poduzimanje konkretnih mjera ili realizaciju projekta u cilju rasterećenja saobraćajnih gužvi na području općine Vogošća, koje već duži niz godina predstavlja ozbiljan problem za građane, svakodnevno funkcionisanje lokalne zajednice, ali i sigurnost svih učesnika u saobraćaju. S obzirom na učestale zastoje, povećan rizik od saobraćajnih nezgoda, te ugroženu sigurnost pješaka i vozača, posebno u periodima saobraćajnih špičeva, molim da se dostave informacije da li su planirane kratkoročne i/ili dugoročne mjere za rasterećenje gužvi i unapređenje sigurnosti saobraćaja (izmjene režima saobraćaja, signalizacija, rekonstrukcija, nova infrastrukturna rješenja i sl.).

Vijećnik **Omerović Denis (u ime Kluba vijećnika SDP)** priložio je slijedeća vijećnička pitanja:

17/18. Zašto se još uvijek nije započelo sa realizacijom projekta iz Programa prioriteta – rekonstrukcija ulice Stara Željeznička stanica, za koju su sredstva već planirana u Budžetu. Ukoliko realizaciju projekta usporava ili onemogućava problem vezan za tzv. bunkerski most i rješavanje tehničkih pitanja na toj lokaciji, da li je razmatrana mogućnost da se u međuvremenu izvrši rekonstrukcija i asfaltiranje dijela ulice od kuće Zijada Kerle do bunkerskog mosta, kako bi se barem djelimično unaprijedila infrastruktura i poboljšali uslovi za građane.

17/19. Kada će se realizovati inicijativa za zamjenu, odnosno postavljanje adekvatne table koja označava ulaz u naselje Svrake. S obzirom na značaj adekvatne signalizacije za identifikaciju naselja, informisanje građana i posjetilaca, molim nadležne službe da dostave informaciju o statusu ove inicijative i planiranom roku za njenu realizaciju.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26
Vogošća, 04.05.2026.godine

**INICIJATIVE POKRENUTE
NA 17. REDOVNOJ SJEDNICI OPĆINSKOG VIJEĆA VOGOŠĆA
održanoj 30.04.2026. godine**

Na 16. redovnoj sjednici Općinskog vijeća vijećnik **Selimović Bego (u ime Kluba vijećnika SDA)** pokrenuo je slijedeće inicijative:

17/1. Pokrećem inicijativu da se izvrši regulacija saobraćajnih tokova vertikalnom signalizacijom prema prvenstvu prolaza na dijelu saobraćajne trake Svrake III, lokacija prije kružnog toka na ukrštanju lokalnih saobraćajnica.

Obrazloženje:

Na predmetnom lokalitetu ispod mosta nalaze se dvije kolovozne površine koje se spajaju na lokalnu saobraćajnicu koje su denevelisane. Na navedenoj dionici potrebna je adekvatna saobraćajna signalizacija zbog bezbijednog odvijanja saobraćaja i zbog smanjenja rizika od saobraćajnih nesreća, naročito zbog nejasno definisanog prvenstva prolaza. S obzirom na frekventnost saobraćaja, smatram da je neophodno postavljanje odgovarajućih vertikalnih znakova (npr. znakovi za obavezno zaustavljanje, ustupanje prvenstva prolaza, upozorenja i sl.) kako bi se povećala sigurnost svih učesnika u saobraćaju. Molim nadležnu službu da izvrši uviđaj na terenu i poduzme potrebne mjere u cilju rješavanja navedenog problema.

17/2. MZ Svrake poprima naznake urbane sredine što je dobro, a može i bolje. U ime građana MZ Svrake pokrećem inicijativu da se na jednom dijelu dionice puta Svrake III utvrde vlasnički odnosi na nakretninama kroz koje prolazi navedena dionica, da se riješe imovinsko-pravni odnosi i da se pristupi rehabilitaciji iste.

Obrazloženje:

Obzirom da je usvojen Regulacioni plan za centralni dio naselja Svrake, potrebno je da se ovaj dio puta uredi i spoje ostali dijelovi naselja kvalitetnim putem do centralnog dijela. Imam informaciju da su vlasnici zemljišta raspoloženi da udovolje potrebama građana, samo treba imovinsko-pravna služba prontno da djeluje i da se pristupi izradi potrebne projektne dokumentacije. Realizacijom ove inicijative naselje Svrake bi bilo povezano modernom saobraćajnicom od „Amka“ do Boranja, u nadi da će i stanovnici Krivoglavaca nakon vodosnabdijevanja, riješiti i blagodatni moderne saobraćajnice i šetnice za građane.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

17/3. Pokrećem inicijativu prema nadležnoj općinskoj službi, za dogradnju trotoara na mostu u ul. Akifa ef. Biserovića, na rijeci Vogošći u neposrednoj blizini Srednjoškolskog centra Vogošća.

Obrazloženje:

U cilju unapređenja sigurnosti pješaka i osiguranja nesmetanog kretanja građana, pokrećem inicijativu za izgradnju trotoara na mostu u ul. Akifa ef. Biserovića koji se nalazi na rijeci Vogošći u neposrednoj blizini Srednjoškolskog centra. Most trenutno nema adekvatnu pješačku stazu, što predstavlja značajan rizik za sigurnost učesnika u saobraćaju, naročito djece, starijih osoba i osoba sa smanjenom pokretljivošću koji su prinuđeni koristiti kolovoznu površinu za prelazak preko mosta. Izgradnjom trotoara omogućilo bi se sigurno kretanje pješaka, smanjio rizik od saobraćajnih nezgoda i podigao opći nivo komunalne infrastrukture i kvaliteta života građana. Predlažem da nadležni organi pokrenu postupak projektovanja i

izgradnje trotoara, uz uvažavanje važećih propisa o sigurnosti saobraćaja i standarda za javnu infrastrukturu. Ova inicijativa ima za cilj da se osigura dugoročna zaštita pješaka i unaprijedi funkcionalnost mosta kao javnog dobra.

- 17/4.** Pokrećem inicijativu prema nadležnoj Policijskoj upravi Vogošća, radi poduzimanja konkretnih mjera i radnji na rješavanju saobraćajne gužve u jutarnjim i poslijepodnevnim satima u raskrsnici ul. Spasoja Blagovčanina – Akifa ef. Biserovića.

Obrazloženje:

Naime, u jutarnjim i poslijepodnevnim satima kada građani sa svojim vozilima odlaze i vraćaju se sa posla, u neposrednoj blizini ili na samoj raskrsnici ul. Spasoja Blagovčanina – Akifa ef. Biserovića u saobraćajnim trakama u oba smjera budu zaustavljena i parkirana vozila od strane neodgovornih vozača koji odlaze do pekare ili do pijace te na taj način ugrožavaju normalno odvijanje saobraćaja. Navedenim postupkom se stvaraju saobraćajne gužve koje onemogućavaju nesmetan prolazak ostalih učesnika u saobraćaju što prouzrokuju kolone vozila i saobraćajnu gužvu, kao i pristup privrednim subjektima koji obavljaju svoje djelatnosti u neposrednoj blizini navedenog lokaliteta. Potrebno je da policijski službenici PU Vogošća u jutarnjim i popodnevnim satima poduzmu preventivne i represivne mjere kako bi se saobraćaj na navedenom lokalitetu normalizovao i učesnicima u saobraćaju odnosno građanima i privrednicima omogućio nesmetan prolazak i pristup objektima.

Vijećnik **Turković Faruk (u ime Kluba vijećnika SDA)** pokrenuo je slijedeću inicijativu:

- 17/5.** Pokrećem inicijativu prema Službi za komunalne poslove Općine Vogošća da izda potrebnu saglasnost za uklanjanje kontejnerskih niša kod pasarele na Kobiljoj Glavi.

Obrazloženje:

Na 17. sjednici Općinskog vijeća, u okviru tačke dnevnog reda „Informacija o planu održavanja komunalne higijene KJKP “RAD”“, postavio sam pitanje zašto do sada nisu uklonjene predmetne kontejnerske niše, na što sam u više navrata ranije ukazivao i tražio njihovo uklanjanje. Tom prilikom, predstavnik KJKP “RAD” je istakao da uklanjanje nije u nadležnosti preduzeća, te da su oni spremni izvršiti predmetne aktivnosti, ali da čekaju saglasnost nadležne Službe za komunalne poslove Općine Vogošća. S obzirom na navedeno, kao i na činjenicu da postojeće kontejnerske niše i kontejneri na toj lokaciji predstavljaju dugogodišnji problem za stanovnike, narušavaju komunalni red i estetski izgled najuže jezgre naselja, smatram opravdanim i neophodnim da se isti uklone. Stoga tražim od Službe za komunalne poslove Općine Vogošća da hitno izda potrebnu saglasnost, kako bi nadležno komunalno preduzeće moglo pristupiti uklanjanju kontejnerskih niša i time doprinijeti unapređenju komunalne higijene i kvaliteta života građana.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

- 17/6.** Pokrećem inicijativu za postavljanje javne rasvjete u naselju Nebočaj (kod broja 184).

Obrazloženje:

Pokrećem inicijativu prema nadležnoj općinskoj službi za postavljanje javne rasvjete u naselju Nebočaj, na lokaciji kod kućnog broja 184., odnosno u dijelu naselja gdje se nalaze posljednje kuće. Na navedenoj lokaciji živi oko desetak domaćinstava, a iako su stubovi za javnu rasvjetu već postavljeni, rasvjeta nikada nije instalirana, zbog čega je ovaj dio naselja u potpunom mraku. Nedostatak rasvjete predstavlja problem za svakodnevno kretanje stanovnika, posebno u večernjim satima, te utiče na sigurnost i kvalitet života građana. S obzirom da infrastruktura za postavljanje rasvjete već postoji, smatram da je neophodno izvršiti instalaciju rasvjetnih tijela i staviti javnu rasvjetu u funkciju. Molim nadležnu službu da izvrši uvid na terenu i preduzme potrebne aktivnosti kako bi se ovaj problem trajno riješio.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

- 17/7.** Pokrećem inicijativu za zamjenu dotrajalih i postavljanje novih zastava na spomeniku maloljetnim borcima Armije Republike Bosne i Hercegovine u naselju Rosulje.

Obrazloženje:

U naselju Rosulje, općina Vogošća, izgrađen je spomenik posvećen maloljetnim borcima Armije Republike Bosne i Hercegovine. Spomenik je podignut na inicijativu Udruženja maloljetnih boraca Armije Republike Bosne i Hercegovine Općine Vogošća i predstavlja trajno obilježje sjećanja i poštovanja prema svim maloljetnim borcima koji su dali doprinos u odbrani Bosne i Hercegovine. Maloljetni borci s područja općine Vogošća, kojih ima 213, s ponosom ističu značaj ovog spomen-obilježja, koje je rezultat njihove inicijative i koje je posvećeno svim maloljetnim borcima Armije R BiH.

Na spomeniku su bile postavljene zastave Općine Vogošća, državna zastava Bosne i Hercegovine, kao i zastava Armije Republike Bosne i Hercegovine. Međutim, usljed vremenskih neprilika i protoka vremena, zastave su oštećene, pocijepane, a pojedine su u potpunosti uklonjene. Trenutno stanje ne odražava dostojanstvo i značaj ovog spomen-obilježja. S obzirom na navedeno, smatram neophodnim da se izvrši zamjena postojećih i postavljanje novih zastava, kako bi spomenik bio uređen na način koji dolikuje njegovoj simbolici i značaju. Posebno je važno istaći da u naselju Rosulje živi veliki broj porodica šehida i poginulih boraca, naročito majki šehida, ne samo iz Sarajeva već i iz drugih krajeva Bosne i Hercegovine. Time dodatno raste značaj očuvanja dostojanstva ovog spomen-obilježja.

17/8. Pokrećem inicijativu za rekonstrukciju i obnovu "Cvijet Srebrenice" u ulici Feriza Merzuka.

Obrazloženje:

U ime građana naše općine, a posebno stanovnika ulice Feriza Merzuka, podnosim inicijativu za rekonstrukciju i obnovu simbola „Cvijet Srebrenice“, koji se nalazi u navedenoj ulici. Ovaj simbol je u prethodnim godinama predstavljao važan znak sjećanja i podsjećanja na genocid počinjen u Srebrenici. Napominjem da sam i prethodne godine podnio istu inicijativu, međutim, simbol trenutno nije adekvatno uređen i zahtijeva obnovu. Obnova ovog simbola ne predstavlja samo pitanje uređenja javne površine, već i čin dubokog poštovanja prema žrtvama najvećeg zločina počinjenog na tlu Evrope nakon Drugog svjetskog rata. Dodatno, imajući u vidu da je u ovoj ulici izgrađena nova pješačka staza, važno je da se posebna pažnja posveti i uređenju neposrednog okruženja, uključujući i navedeni simbol. Time bi se omogućilo da i nove generacije budu podsjećane na značaj kulture sjećanja, kao i na vrijednosti empatije, solidarnosti i zajedničkog pamćenja koje nas oblikuje kao društvo. Podsjećam da se na području naše općine nalazi i Trg žrtava genocida u Srebrenici, koji iz ptičije perspektive nosi oblik „Cvijeta Srebrenice“ – snažnog simbola otpora, dostojanstva i sjećanja. Njegova forma i poruka nisu samo urbanistički element, već i jasan izraz opredijeljenosti naše lokalne zajednice da žrtve ne smiju biti zaboravljene, te da je njegovanje kulture sjećanja naša trajna obaveza. Ova inicijativa ne zahtijeva značajna materijalna ulaganja, ali nosi izuzetnu simboličku vrijednost, kako za porodice žrtava genocida, tako i za cjelokupnu lokalnu zajednicu.

Vijećnik **Škoro Hamdija** (u ime Kluba vijećnika **Naprijed BiH**) pokrenuo je slijedeću inicijativu:

17/9. Pokrećem inicijativu prema nadležnoj općinskoj službi i nadležnom ministarstvu da se semafori na raskrsnici Ugorsko odmah stave u funkciju. Pored toga da se na zaustavnoj traci stanice postave usporivači brzine, kao i da se rasvjeta na samoj raskrsnici zamijeni i stavi u funkciju.

Obrazloženje:

Kada smo neki dan na društvenim mrežama vidjeli snimak vlasnika objekta u blizini raskrsnice, svi koji su pogledali snimak ostali su u šoku i nevjerici zbog divljanja i ugrožavanja sigurnosti pješaka i učesnika u saobraćaju. Naime, divljanje neodgovornih vozača kroz raskrsnicu, odnosno njihovo utrkivanje ugoražva sigurnost pješaka i vozača. Stoga je neophodno da se semafori na ovoj raskrsnici odmah stave u funkciju, a da se zaustavna traka stanice pokrije usporivačem brzine, kako ne bi služila za utrkivanje i brzo zaobilaženje semafora. Pored toga u večernjim satima prelazak ceste pješacima je jako otežan obzirom da većina sijalica rasvjete nije u funkciji. Molim nadležnu službu da odmah reaguje po ovom pitanju kako bi smo izbjegli neželjene posljedice.

Vijećnik **Handić Jasmin** (u ime Kluba vijećnika **SDA**) pokrenuo je slijedeće inicijative:

17/10. Pokrećem inicijativu prema Federalnom Ministarstvu kulture i sporta da se pokrene proces istraživanja i konzerviranja u cilju zaštite kulturno historijske baštine i unapređenje turističke ponude.

Obrazloženje:

Na lokalitetu Vranjak, u blizini Semizovca, prema dosadašnjim pretpostavkama postoji gradina iz prahistorijskog perioda. Na terenu su uočljivi ostaci zidina, što dodatno upućuje na postojanje utvrđenog naselja na ovom prostoru. Ovu pretpostavku dodatno potkrepljuje činjenica da je u Semizovcu evidentiran prahistorijski lokalitet iz bronzanog doba, kao i arheološko nalazište Grad u Svrakama. Uzimajući u obzir prostornu povezanost i kontinuitet naseljenosti, postoji opravdana osnova za zaključak da se na lokalitetu Vranjak nalazila gradina.

17/11. Pokrećem inicijativu prema Ministarstvu odgoja i obrazovanja Kantona Sarajevo za rješavanje radno-pravnog statusa asistenata u nastavi u osnovnim i srednjim školama.

Obrazloženje:

Asistenti u nastavi imaju ključnu ulogu u pružanju podrške djeci s poteškoćama u razvoju, ali je njihov radno-pravni status trenutno nesiguran i privremen. Većina asistenata radi putem kratkoročnih ugovora, bez stabilnosti zaposlenja, punih radnih prava i adekvatne profesionalne sigurnosti. Iako su Pedagoškim standardima propisani uslovi i stručne kvalifikacije za ovo zanimanje, neophodno je sistemski urediti njihov status kroz dugoročna rješenja, transparentne procedure zapošljavanja i osiguravanje osnovnih prava iz radnog odnosa. Rješavanje statusa asistenata u nastavi predstavlja važan korak ka kvalitetnijem obrazovanju i boljoj podršci učenicima kojima je pomoć najpotrebnija.

Vijećnica **Šabić Dalia (u ime Kluba vijećnika DF)** pokrenula je slijedeću inicijativu:

17/12. Pokrećem inicijativu prema Policijskoj upravi Vogošća za unapređenje sigurnosti i regulaciju saobraćaja ispred Osnovne škole „Zahid Baručija“.

Obrazloženje:

Poštovani, obraćam vam se s inicijativom prvenstveno u cilju povećanja sigurnosti djece, kao i roditelja/staratelja, ispred Osnovna škola Zahid Baručija u Vogošći. Naime, učenici od prvog do četvrtog razreda nisu u mogućnosti samostalno odlaziti kući, te po njih svakodnevno dolaze roditelji ili druge odrasle osobe. U periodima završetka druge smjene (oko 16:45 i 17:30 sati) dolazi do velike koncentracije vozila – privatnih automobila i minibusa za prevoz djece – što stvara gužve i otežava bezbjedno kretanje djece i odraslih. U takvim okolnostima dolazi do neorganizovanog saobraćaja, zastoja i potencijalno opasnih situacija, posebno imajući u vidu uzrast djece. Smatram da bi, u cilju zaštite sigurnosti djece i svih učesnika u saobraćaju, bilo dovoljno obezbijediti prisustvo policijskih službenika u navedenim terminima (16:40 i 17:30 sati), kako bi se regulisao saobraćaj u periodima najveće gužve i omogućio siguran dolazak i odlazak učenika. Naglašavam da nije potrebna stalna prisutnost tokom cijelog dana, već organizovano prisustvo u ova dva termina, kada je frekvencija saobraćaja najveća. Ova mjera bi značajno doprinjela smanjenju gužvi, boljoj organizaciji saobraćaja i što je najvažnije, većoj sigurnosti djece i njihovih roditelja. Molim vas da razmotrite ovu inicijativu i poduzmete potrebne korake u skladu sa vašim nadležnostima.

Vijećnica **Karović Amra (u ime Kluba vijećnika SDP)** pokrenula je slijedeću inicijativu:

17/13. Pokrećem inicijativu da se pristupi realizaciji postavljanja adekvatne rasvjete na lokalitetu Džindino brdo.

Obrazloženje:

Ova inicijativa je već pokrenuta u nekom od prošlih saziva Vijeća, međutim nikada nije došlo do njene realizacije. Obzirom na važnost memorijalnog spomenika i očivanja kulturne baštine, smatram da uređenjem ovog prostora dodatno njegujemo, čuvamo kulturu i historijski značaj spomenika. Spomenik je podignut 1969. godine i svake godine se održava manifestacija i obilježava godišnjica poginulim borcima. Osvjetljenjem, dodatnim uređenjem i klupama dobit će pravu vrijednost, a samim tim daje Vogošći opet ljepši izgled i mjesto gdje se mogu održavati još neka kulturno-historijska dešavanja, predavanja i sl.

Vijećnik **Bogilović Enis (u ime Kluba samostalnih vijećnika Bogilović-Džano)** pokrenuo je slijedeće inicijative:

17/14. Pokrećem inicijativu da se u MZ Kobilja Glava imenuje sekretar.

Obrazloženje:

Već duži period Kobilja Glava nema svog sekretara mjesne zajednice, probleme mjesne zajednice prenosi ili rješava Enin koji je sekretar MZ Svrake. Smatram da bi se imenovanjem sekretara mnogi problemi lokalne zajednice mnogo brže i efikasnije bili rješavani.

17/15. Pokrećem inicijativu prema nadležnoj službi da proslijedi Cestama Federacije BiH da se sanira dio magistralnom puta M18, pružni prelaz kod doma vatrogasaca prije kružnog toka iz pravca Vogošće prema gradu.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

- 17/16.** Pokrećem inicijativu prema nadležnom ministarstvu saobraćaja Kantona Sarajevo o usklađivanju vožnji na linijama gradskog saobraćaja koje se voze prema Vogošći.

Obrazloženje:

Inicijativu upućujem nadležnom Ministarstvu saobraćaja Kantona Sarajevo, koje je odgovorno za promet svih gradskih prevoznih vozila i redu vožnji. Po rasporedu vožnji koje voze autobuski saobraćaj Sutjeska-Vogošća, te trolejbuski saobraćaj Trg 6. April — Vogošća, izgleda sve fenomenalno i bespriekorno, ali u stvarnom stanju nije tako. Naime autobus i trolejbus dolaze u isto vrijeme, a po rasporedu bi trebalo svakih 10-15 minuta. Poklapa se često da dođu u isto vrijeme, onda bude pauza po nekih pola sata što izazove velike gužve. Molim vas da prenesete na preduzeća koja su odgovorna za navedene linije da međusobno usklade red vožnje, radi mnogo razloga.

- 17/17.** Pokrećem inicijativu prema nadležnim, a to su Direkcija za ceste F BiH i Sarajevoputevi da uklone otpad u zoni prostora koje su u njihovoj nadležnosti.

Obrazloženje:

Kako bi zaštitili zdravlje svih nas, sačuvali prirodu, smanjili začepljenje odvodnih instalacija, a na kraju i sam izgled naše općine učinili ljepšim, podnosim inicijativu prema nadležnoj Direkciji za ceste F BiH i Sarajevoputevi, da poduzmu i riješe problem čišćenja otpada i ostalog nanosa u zoni odgovornosti koje njima pripadaju, a to je oko puteva koji se nalaze u našoj općini.

Vijećnik **Cvrk Ćamil (u ime Kluba vijećnika DF)** pokrenuo je slijedeću inicijativu:

- 17/18.** Pokrećem inicijativu za sanaciju kolovoza i čišćenje odvodnih rešetki na raskrsnici u ulici Donja Jošanica.

Obrazloženje:

Pokrećem inicijativu prema nadležnoj općinskoj službi za sanaciju oštećenja kolovoza na raskrsnici u ulici Donja Jošanica, na spoju dionica Donja Jošanica I i Donja Jošanica II (raskrsnica prema crkvi). Na navedenoj lokaciji nalazi se rupa na kolovozu koja se konstantno širi i predstavlja opasnost za učesnike u saobraćaju, kako za vozila tako i za pješake. Pored oštećenja kolovoza, odmah u blizini navedene rupe nalaze se kanalizacione rešetke koje su začepljene pijeskom i nečistoćama, što dodatno pogoršava stanje na ovoj lokaciji i onemogućava adekvatnu odvodnju oborinskih voda. Takvo stanje može dovesti do zadržavanja vode, dodatnog oštećenja kolovoza i ugrožavanja sigurnosti saobraćaja. S obzirom na frekventnost ove raskrsnice, smatramo da je neophodno izvršiti hitnu sanaciju oštećenog dijela kolovoza, očistiti i osposobiti kanalizacione rešetke za normalno funkcionisanje, te preventivno djelovati kako bi se spriječilo dalje širenje oštećenja. Molimo nadležnu službu da izvrši uviđaj na terenu i preduzme potrebne mjere.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

- 17/19.** Pokrećem inicijativu prema nadležnoj općinskoj službi i komunalnom preduzeću da se u ulici Braće Halać, hitno postave kante za odlaganje sitnog otpada na više frekventnih lokacija.

Obrazloženje:

Naime, navedena ulica se nalazi u neposrednoj blizini dvije škole, te je svakodnevno veliki broj učenika koristi tokom dolaska i odlaska iz škole, kao i za vrijeme velikog odmora. Učenici u tom periodu često kupuju hranu i piće, a zbog nedostatka kanti za smeće ambalaža i ostali otpad završavaju na trotoarima, zelenim površinama i drugim javnim površinama, čime se stvara ružna slika u samom centru Vogošće. Postavljanjem adekvatnog broja kanti za smeće doprinijelo bi se održavanju higijene, zaštiti okoliša i stvaranju urednijeg i ljepšeg ambijenta za sve građane, a posebno za učenike i uposlenike obližnjih škola. Molim nadležne službe da razmotre ovu inicijativu i poduzmu potrebne korake u što kraćem roku.

- 17/20.** Pokrećem inicijativu u vezi sa hitnom sanacijom oštećenih šahtova u ulici Igmanska, na magistralnom putu M 18, u pravcu skretanja prema ulici Skendera Kulenovića (prema Domu zdravlja).

Obrazloženje:

U skladu sa svojim ovlaštenjima pokrećem vijećničku inicijativu prema nadležnim službama i upravljaču magistralne ceste M 18, a u vezi sa hitnom sanacijom oštećenih šahtova na navedenoj lokaciji. Naime, šahtovi u ulici Igmanska, u zoni skretanja prema ulici Skendera Kulenovića, vidno su oštećeni i utonuli, što predstavlja ozbiljnu opasnost za sve učesnike u saobraćaju. Vozila koja koriste isključnu traku za skretanje, u pokušaju izbjegavanja

oštećenja, često prelaze u suprotnu saobraćajnu traku, čime direktno ugrožavaju sigurnost drugih vozila i pješaka, te značajno povećavaju rizik od saobraćajnih nezgoda. Imajući u vidu frekventnost ove saobraćajnice, kao i svakodnevno kretanje velikog broja vozila, navedeni problem zahtijeva hitnu reakciju nadležnih institucija. Predlažem da nadležna institucija i upravljač magistralne ceste M 18:

- izvrše hitan uvid u stanje na terenu,
- pristupe sanaciji i nivelisanju oštećenih šahtova,
- poduzmu sve potrebne mjere kako bi se osigurala sigurnost svih učesnika u saobraćaju.

Molim da me o poduzetim aktivnostima i planiranim mjerama informišete pisanim putem.

Vijećnica **Kobiljak Elvedina (u ime Kluba vijećnika SDA)** pokrenula je slijedeću inicijativu:

17/21. Pokrećem inicijativu prema nadležnoj općinskoj službi za uređenje Centralnog spomenika šehidima i poginulim borcima u Vogošća.

Obrazloženje:

Na Centralnom spomeniku šehidima i poginulim borcima većina slova (imena i prezimena) su potpuno ili djelimično izbrisana ili oštećena, te je neophodno da se uradi novo upisivanje imena i sanacija oštećenja. Održavanje spomenika šehidima i poginulim borcima je naša obaveza.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

17/22. Pokrećem inicijativu prema Direkciji za puteve Kantona Sarajevo za sanaciju kolovozne konstrukcije na pružnom prelazu u ulici Igmanska. Predmet inicijative je pokretanje aktivnosti na sanaciji oštećene asfaltno podloge na pružnom prelazu u ul. Igmanska, na raskrsnici sa semaforom regulacijom saobraćaja.

Obrazloženje:

Na predmetnoj lokaciji, koja predstavlja jednu od frekventnijih saobraćajnih tačaka na području općine Vogošća, evidentno je značajno oštećenje kolovozne konstrukcije na pružnom prelazu. Asfaltna podloga između i uz šine je u izrazito lošem stanju, sa vidljivim ulegnućima, deformacijama i oštećenjima, što otežava nesmetano odvijanje saobraćaja, uzrokuje oštećenja na vozilima, predstavlja potencijalnu opasnost za sigurnost učesnika u saobraćaju i dodatno opterećuje raskrsnicu koja je već regulisana semaforima. S obzirom na frekvenciju saobraćaja i značaj ove lokacije, sanacija je neophodna i ne može se odlagati. Predlažem da Direkcija za puteve Kantona Sarajevo izvrši uvid na terenu i evidentira stvarno stanje, pokrene inicijativu i koordinaciju sa Željeznicama Federacije Bosne i Hercegovine i drugim relevantnim institucijama, zatraži i pokrene hitnu sanaciju oštećenog dijela kolovoza. Cilj inicijative je povećanje sigurnosti saobraćaja, zaštita vozila i imovine građana, poboljšanje funkcionalnosti jedne od ključnih saobraćajnica na području općine Vogošća kao i prevencija saobraćajnih nezgoda.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

17/23. Pokrećem inicijativu prema JU Zavod za medicinu rada Kantona Sarajevo i Ministarstvu zdravstva Kantona Sarajevo za unapređenje dostupnosti zdravstvenih usluga u oblasti medicine rada, kroz uvođenje rada u dvije smjene svakim radnim danom u ambulanti Vogošća.

Obrazloženje:

Trenutna organizacija rada u ambulanti Vogošća odvija se u jednoj smjeni, tri dana u prvju i dva dana u drugoj smjeni, što predstavlja značajnu prepreku za veliki broj zaposlenih građana koji zbog svojih radnih obaveza nisu u mogućnosti pristupiti pregledima u dostupnim terminima. Ovo posebno pogađa radnike u privatnom sektoru, posebno radnike kod kojih je rad organizovan u smjenama. Smatram da je uvođenje rada u dvije smjene nužan korak ka povećanju efikasnosti zdravstvene usluge za radnike, te da bi ova mjera značajno unaprijedila kvalitet i dostupnost usluga medicine rada u ambulanti Vogošća. Molim nadležne institucije da razmotre ovu inicijativu i poduzmu konkretne korake ka njenoj realizaciji.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

17/24. Pokrećem inicijativu prema Sarajevo šume Sarajevo za planiranje i izgradnju pješačke staze sa drvenim mostovima na relaciji Jošanički potok – Crveni križ Vogošća. Poštovani obraćam se sa inicijativom za planiranje i izgradnju nove pješačke staze kroz šumsko područje iznad Jošaničkog potoka, sa pratećim sadržajem u vidu manjih drvenih mostova za prelazak preko potoka i njegovih pritoka, na području Vogošće.

Obrazloženje:

Predložena trasa obuhvata prirodno atraktivan teren uz vodotok, ali je kretanje trenutno otežano zbog neuređenih prelaza preko potoka. Izgradnjom staze i drvenih mostova omogućila bi se kontinuirana i sigurna komunikacija kroz šumsko područje. Realizacijom ovog projekta postigli bi se sljedeći benefiti:

- sigurno i nesmetano kretanje pješaka
- valorizacija prirodnog ambijenta uz očuvanje okoliša
- razvoj rekreacije, šetnje i boravka u prirodi
- stvaranje atraktivne izletničke rute
- unapređenje turističkog potencijala općine Vogošća.

Predlažem da Sarajevo šume pokrene slijedeće aktivnosti:

1. Terenski obilazak i definisanje trase staze
2. Identifikaciju tačaka za izgradnju drvenih mostova
3. Izradu idejnog i izvedbenog rješenja (staza + mostovi)
4. Pribavljanje potrebnih dozvola (vodoprivredne i okolišne saglasnosti)
5. Izgradnju staze uz minimalne intervencije u prirodi
6. Izgradnju drvenih mostova:
 - od prirodnih i trajnih materijala
 - sa zaštitnim ogradama
 - prilagođenih pješačkom i rekreativnom korištenju
7. Postavljanje signalizacije, klupa i informativnih tabli.

Posebna napomena: Predlaže se da mostovi budu projektovani kao ekološki prihvatljive konstrukcije (drvo, kombinacija sa kamenom), uklopljene u prirodni ambijent, uz maksimalno očuvanje vodotoka i šumskog ekosistema.

Zaključak:

Izgradnja pješačke staze sa drvenim mostovima predstavlja značajan infrastrukturni i ekološki projekat za Vogošću, koji bi dugoročno doprinio kvalitetu života građana i održivom razvoju lokalne zajednice.

17/25. Pokrećem inicijativu da Općina Vogošća u cilju povećanja transparentnosti i digitalizacije usluga, pristupi realizaciji projekta Elektronske oglasne ploče (e-Oglasna ploča) koji uključuje:

1. Instalaciju interaktivnih LED ekrana (kioska) na frekventnim lokacijama: ispred zgrade Općine, kod Doma zdravlja, te u centrima mjesnih zajednica.
2. Uspostavu digitalnog modula na zvaničnoj web stranici općine koji će u realnom vremenu preslikavati sadržaj fizičke oglasne ploče.
3. Omogućavanje uvida u sve konkurse, javne pozive, prostorno-plansku dokumentaciju i obavještenja o radovima putem QR kodova.

Obrazloženje:

Neke općine u Kantonu Sarajevo su već usvojile i implementirale ovaj sistem. Trenutni način informisanja građana u Vogošći je zastario. Uvođenjem Elektronske oglasne ploče:

- Smanjujemo troškove štampanja i papira.
- Građanima omogućavamo pristup informacijama 24/7 putem pametnih telefona.
- Sprečavamo uklanjanje ili oštećenje važnih javnih oglasa.
- Podižemo nivo transparentnosti rada općinske administracije.

Vijećnik **Omerović Denis (u ime Kluba vijećnika SDP)** priložio je slijedeće inicijative:

17/26. Pokrećem inicijativu da se izvrši unapređenje uslova u poslovnom prostoru koji je u vlasništvu Općine Vogošća, a koji je trenutno dat u zakup Udruženju „Korak više“.

Obrazloženje:

Inicijativa podrazumijeva ugradnju klima uređaja, kao i zamjenu dotrajale stolarije, odnosno prozora i vrata, s ciljem poboljšanja funkcionalnosti, energetske efikasnosti i općih uslova boravka i rada u navedenom prostoru. Uzimajući u obzir značaj aktivnosti koje Udruženje

„Korak više“ provodi, te činjenicu da se radi o prostoru u vlasništvu Općine, smatram da je opravdano ulaganje u njegovo održavanje i unapređenje. Molim nadležnu službu da razmotri ovu inicijativu i poduzme potrebne korake za njenu realizaciju.

- 17/27.** Pokrećem inicijativu na zahtjev mještana za označavanje dva dodatna parking mjesta za osobe sa invaliditetom u ulici Skendera Kulenovića, u blizini broja 30.

Obrazloženje:

Stanovnici ovog dijela naselja su ukazali na nedovoljan broj adekvatno obilježenih parking mjesta za osobe sa invaliditetom, što svakodnevno stvara poteškoće u kretanju i obavljanju osnovnih aktivnosti osobama kojima je ovakva vrsta pristupačnosti neophodna. Molim nadležnu službu da razmotri ovu inicijativu i poduzme potrebne aktivnosti kako bi se osigurali bolji uslovi za sve građane.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir